

PRESSEMITTEILUNG

Niech Lannsbeupdrachte för Nedderdüütsch

**Schworpunkt von ehr Upgåwen is de Födderung un Plääch von dat
Plattdüütsche bi de Billung**

Mäkelborg-Vörpommern hett ein niech Lannsbeupdrachte för
Nedderdüütsch. Nadine Koop hett de Upgåf mit den Anfang von't
lopen Schauljohr æwernåhmen. De Schworpunkt von ehr Upgåwen is
de Födderung un Plääch von dat Plattdüütsche bi de Billung.
Båbentau is se noch för de Anliggen von't Nedderdüütsche in MV in
dat Land, bi den Bund un internatschonal taustännig.

Billungsministersche Simone Oldenburg: „För Nadine Koop is Platt
wat, dat ehr an dat Hart liggen deit. Ik høech mi, dat wi mit ehr ein
angaschiert Mitarbeitersche wunnen hebben, de sik üm dat
plattdüütsch Arf kümmern deit un junge Minschen för Platt begeistern
mach. Mit uns Nedderdüütsch-Botschappersche Jette Bolz hett se ein
starken Partnersche an ehr Siet. Tau den irsten Mål in de Geschicht vun
dat Land hebben wi sogor ein eigen half Städ för de Lannsbeupdrachte
inricht. Bet dorhen wier dat jüst ein Beschäftigung up Afordung. In
Tieden mit ein sworn Hushaltsläch is dat keen Sülftverständnlichkeit
nich un deit ünnerstrieken, wo wichtig uns de Plääch un de Födderung
von dat Nedderdüütsche is.“

Nedderdüütsch Lannsbeupdrachte Nadine Koop: „Ik hoech mi bannig
æwer de niegen Upgåwen un de Schangs, dat ik an de Taukunft vun't
Nedderdüütsche hier aktiv mitarbeiten kann. In de verlåden Johren
heff ik mit't Nedderdüütschsekretariat/Bunnsraat för Nedderdüütsch
'n plattdüütsch Jøechdarbeit upbuen künnt un mach Platt ok girn för
junge Lüd in MV taugänglicher måken.“

Nadine Koop hett al in dat dfg-Projekt „Wossidlo-Teuchert online“ an
de Wossidlo-Forschungsstäd von de Universität Rostock an de
Digitalisierung von dat Mäkelbörjsche Wüürbauk mitmåkt, un harr ok
dat Leitt von dat Projekt „Späldäl Rostock“, dör dat Nåwass för de
Nedderdüütsche Amateur-Bühns wunnen warden sall. Se de al
Nedderdüütsch ünnerrichten un angaschiert sik bi den Heimatverband
MV e. V. un bi de Nedderdüütsche Bühn Rostock. Mit ehr Kinner
schnackt se Platt.

BM

Schwerin, 03. November 2025

Nummer: 174-25

Ministerium für Bildung und
Kindertagesförderung
Mecklenburg-Vorpommern
Werderstraße 124
19055 Schwerin

Telefon +49 385 588-17003
Telefax +49 385 509-17082
presse@bm.mv-regierung.de
www.bm.mv-regierung-mv.de

V. i. S. d. P.: Henning Lipski

Bi den irsten Lannsfackdach Nedderdüütsch an den **Dünnersdach, 6. November 2025**, in dat Ostseebad Boltenhagen stellt sik de nie Lannsbeupdrachte apenlich vör. Bi de Veranstaltung, de ünner dat Motto „All tauhop“ steiht, hebben Liehrerslud un pädagogsch Fackkräften de Gelägenheit, sik tau vernetten un uttatauuschen.

Båbentau warrd bi den Lannsfackdach tau dat irste Mål dat „Nedderdüütsche Schäulerwuurt vun dat Johr“ 2025 ihrt. Bet tau den 10. Oktober 2025 können die 37 Schaulen, de Ünnerriicht in dat Fack Nedderdüütsch anbeiden, ehr Vörschläch för dat nedderdüütsche Wuurt øwer dat lannswiede Lihrmanagementsystem „itslearning“ inlangen. In Mäkelborg-Vörpommern giffet dat 1.300 junge Lüd, de Plattdüütsch in de Schaul liehren.

Up den Lannsfackdach warden ok Schaulen un Kitas, de al ein Nedderdüütsch-Anbott hebben, för ehr Angaschment utteknet.

De Lannsfackdach finnt vun Klock 12 bet Klock halwig 5 in dat Wichernhus in dat Ostseebad Boltenhagen statt. He kricht von dat Kumpetenzzentrum för Nedderdüütschdidaktik von de Universität Gripswold tütt.